

Tico Croes

Pronto proyecto di ley encuanto zona di pesca lo keda entrega na gobierno

ORANJESTAD(AAN) -- Parlamentario Tico Croes a duna di conoce na DIARIO cu relaciona cu e asunto di Starkist ta asina cu aña pasa e Gobierno anterior a cuminsa combersa cu Prof. Soons, persona naci na Aruba, encuanto di un proyecto di ley tocante di un zona di pesca den awanan di Aruba.

Segun Croes, e tin endendi cu e iniciativa y ideanan cu a sali for di e Departamento di Relacionnan Exterior aña pasa, pronto lo bay duna su frutonan ora cu e comision encarga entrega e proyecto di ley na Gobierno.

E proyecto di ley aki segun

Croes, seguramente lo reglamenta e asuntonan di permiso pa pesca den awanan di Aruba. E ley aki por bin cu exigencianan encuanto e tipo di boto, equipo cu por usa, e cuota of cantidad di pesca y e sorto di pesca y hasta por bay asina leu di existi cu companianan extranhero pa pesca den nos awanan mester tin un joint venture cu nos piscadornan local.

Den esaki e organisacion di nos piscadornan lo ta crucial. E barconan Venezolano cu lo a haya permiso segun articulo 4 di e concepto di e acuerdo di pesca cu Venezuela lo mester tene nan

mes leynan di Aruba y por lo tanto no tin nada di barco grandi of barco chikito y ken ta pesca mas hopi.

Segun Croes, control y proteccion di e zona di pesca ta di vital importancia y ta pesey anticipando ariba e ley di pesca, a

pone como un di e tareanan di e boto di Polis PB I cu Gabinete Eman a bestel pa vigila piscamento den awanan di Aruba.

